

天岳山館文鈔

天岳山館文鈔卷三

格物說

格物之說程朱備矣。程子謂或考之事爲之著，或察之念慮之微，或稽之文字之中，或索之講論之際。朱子則謂必使學者卽凡天下之物，因其已知之理而益窮之，以求至乎其極。論者頗疑天下之物無窮，格物者從何起？訖王陽明嘗格庭前竹七日，不能明，幾至成疾。遂力宗古本大學，與程朱異趣。固其樂趨簡易，亦繇程朱之說無一定準繩以示之，則故反疑其支離苦其空闊。其實物字本有古訓，曷若以經解經之爲確也？周禮大司徒以鄉三物教萬民而實興之一曰六德，知仁聖義中和二曰六行，孝友睦婣任恤。

三曰六藝禮樂射御書數司徒之教卽大學之教也大學所格之物卽鄉三物之物也蓋古者人生八歲皆入小學教之以洒掃應對進退之節禮樂射御書數之文則所謂六藝者小學已啟其端矣及其十有五年皆入大學而仍必及六藝者誠以禮有五樂有六射御各有五書有六數有九皆至理所寓終身由之不能盡小學僅啟其端又洒掃應對進退之事多故必於入大學時益窮其理也然藝主文文不可無行故先之以六行行主用用不可無體故先之以六德若是者孔子嘗用之矣子以四教文六藝也行六行也忠信六德也先六藝而後六行六德者所謂博學於文約之以禮亦所謂下學而上達繇小學入大學之節次正如此也大司

徒之教先六德六行而後六藝者所謂入孝出弟謹信親愛行有餘力則以學文蓋孝弟六行中事謹信親仁六德中事學文六藝中事也。繇本及末因源及流義固各有當也。夫大學旣爲初學入德之門三綱領八條目先儒謂學者之格式也旣爲格式則必使學者確有所持循何至始基之一條反若虛懸無薄而又不爲之詮釋其義乎。惟實之以鄉三物則表裏精粗無一不備又係先王之大經大法載在周禮與大學之載在禮記可互相發明也。周之盛時一道同風凡入大學者莫不奉爲憲典共知共行更不待作傳以釋之經所以有此謂知至之明文無此謂物格之文也使程朱以此爲訓不獨無支離空闊之疑亦無事乎補傳矣。且此訓與

程朱正不悖也。程子謂考之事爲非六行乎。察之念慮非六德乎。稽之文字索之講論非六藝乎。朱子謂凡天下之物莫不有理。物理之當窮又豈有大於三物者乎。至程朱訓格爲至。蓋從眾說中精擇以衷諸是者也。而整菴羅氏訓格爲通徹無間。義似尤精。蓋通其格礙之謂格。猶治亂之爲亂。澣污之爲污。安擾之爲擾。格于上下。格于皇天。古義皆如此也。整菴篤信程朱。非陽明比也。而其論如此。然則則天下之義理豈有窮哉。

孟子說

聖賢立言爲萬世植綱常理本各足也。自後儒誤解語病百出。雖曲爲之說而義終未安。如孟子告齊宣王明太祖嘗讀寇讐之說而非之。擬罷其配享。賴諫者而止。然諫者亦未能發明孟子本義。究不足以服明祖之心。而闢其口。此非孟子之失。誤解孟子之失也。孟子特與王論去國之舊臣耳。王聞言卽以爲舊君有服爲問。辭意顯然。豈通論君臣之義哉。其曰君之視臣如手足。臣舊臣也。視如手足。卽下文諫行言聽。以至去三年不反。然後收其田里之謂也。臣視君如腹心。君舊君也。視如腹心。卽下文因三有禮而爲之服之謂也。君視舊臣如土芥。卽下文諫不行言不聽。以至去之

日遂收其田里之謂也。臣視舊君如寇讐，則下文何服之有？已明解之矣。皆爲去國之臣言也。惟其爲去國之臣，名分已殺，故爲舊君服。彌見其厚。然服止齊衰三月，則與服勤至死方喪三年者懸絕矣。若伍員去楚事吳，因吳覆楚，以洩父兄之憤，此正所謂寇讐而君子猶諒之者。以君臣之義早絕也。豈所論於凡爲臣子者哉？漢宋諸儒誤以孟子爲通論君臣之義，則未免悖倫而傷化。傳曰：君天也。天可讐乎？食君之祿，敬君之事，敢以寇讐視君乎？天下無不是之君父。自古亂臣賊子，惟有見於君父之不是，故敢動於惡。聖賢肯爲是言乎？美里操云：臣罪當誅。今天王聖明，孟子所見，豈出昌黎下哉？後儒誤解孟子，遂使立論本悞，墮雲霧中二千餘年。

明祖引爲詬病非無因也宋儒號精義理反諸心而不安乃別爲說以救之楊氏時曰君臣以義合者也故深言報施之道使爲君者知以禮遇其臣耳若君子自處則豈處其薄乎張氏九成曰人君當知此理而人臣不可存此心輔氏廣曰此特爲宣王而發所謂有爲之言也然臣之報君視君之所施常加厚一等皆曲說也使聖賢之言必待後儒補救則不足爲聖賢其言亦不足法矣況如輔氏報施加厚之說則腹心有加於手足固也寇讐有加於土芥其可爲訓乎至潘氏興嗣直謂孟子之言有迹不若孔子對定公之渾然以此爲聖賢之別此又求其解而不得因轉議孟子孟子不任咎也彼自爲去國之臣言耳其與孔子意豈有倍哉烏虜

六經四子書誤解者多矣而此尤悖於倫紀故特爲之辨抑更有說焉舊君舊臣惟春秋戰國分疆裂土時有之孟子生晚周目擊蘇張之徒朝秦暮楚偶與齊王論及耳若天下一統則率土之濱莫非王臣君臣之義無所逃於天地間也尙何舊君爲服之足云哉

檀弓穆公問曰爲舊君反服禮與子思曰古之君子進人以禮退人以禮故有舊君反服之禮今之君子進人若將加諸膝退人若將墜諸淵無爲戎首不亦善乎又何反服之有此正與孟子合不解歷代註家胡皆未讀禮也

貞下起元說

元亨利貞天道也。於德爲仁義禮智。於時爲春夏秋冬。萬物資始於元。受成於貞。自元而亨而利貞。四德相循。貞下復起。元焉人知貞爲萬物之終。不知貞正以涵萬物之始也。何者。天地之大德曰生。一元而已矣。猶仁之統四端。春之貫四時也。元能統天。故稟元氣之全者。生理無弗足。物之生而不遂者。稟元氣不全耳。苗而不秀者。有元而無亨也。秀而不實者。有亨而無利也。雖然。亨矣利矣。而貞尤要焉。蓋萬物生於春。長於夏。斂於秋。藏於冬。冬者風霜之所厲。冰雪之所凝。爲落葉歸根之候。自非堅定不搖。力葆其元氣。有頽然漸滅以盡耳。故曰歲寒然後知松柏之後彫也。有松柏之

貞操則節以寒而愈勁。後此之大生廣生。悉基諸此。如其節不能
貞。則生理一虧。元卽無繇起。萬物或幾乎息矣。此貧賤憂戚所繇
玉汝於成歟。且夫天地之道。一陰一陽。天地之化。一舒一斂。天地
之數。一乘一除。元亨者陽之舒也。乘數也。利貞者陰之斂也。除數
也。乘之則一核散爲萬莖。除之則萬莖收於一核。慎葆此核。勿爲
冰霜風雪所戕。則參天拂雲之勢。卽此而具。有陽春不能無冰雪。
無冰雪更不能成陽春。故非貞無以起元也。自古聖賢豪傑。苦其
心志。勞其筋骨。餓其體膚。空乏其身。行拂亂其所爲。無往非嚴冬
歲寒之象。惟其動心忍性。苦節能貞。故卒承大任之降。所謂元從
貞起者此也。世人秉節不堅。植節不固。遇貧賤憂戚。則嗒然喪其

所守甚且無所不爲此蒲柳之質從風而靡者耳楚之象曰君子以反身修德困之象曰君子以致命遂志夫處逆境必先反身以修德命可致而志不可不遂此聖人教人守貞之道也明乎此故能簞瓢陋巷而不憂肘見踵決而不以爲病凡以葆吾貞固之氣而不失乾元之生理耳齊邱子曰澗松所以凌霜者藏正氣也古之君子貧賤患難無入不自得毅然獨立於層冰積雪中而反己自修一息不容少懈其以此也夫

甘誓湯誓說

孟子曰盡信書則不如無書當其時書未經秦火也未壁藏而口授也未經後人以隸古寫定也孟子之論已如此况自秦火後伏生年過九十失其本經口以傳授裁二十餘篇魯共王於孔壁中得古文尙書皆科斗文字人無知者乃以所聞伏生書考論文義定其可知者爲隸古寫定之增多二十五篇又有張霸之僞書東晉晚出之古文尙書書之失其舊本久矣其不可盡信也茲甚余讀甘誓湯誓而知之一曰予則孥戮汝再曰予則孥戮汝罔有攸赦烏虓此孫吳穰苴所不爲三代必無之事也何者不用命戮于社所謂威克厥愛也然戮及其身止矣武王誓師亦但云爾所弗

勛其于爾躬有戮何至孥戮乎。堯德之廣運也。罰弗及嗣。文王之
行王政也。罪人不孥。惟武王數紂罪。乃曰罪人以族。紂所以罪浮
於桀也。啟與湯豈預開其端乎。漢法降敵者誅其家屬。防叛逆也。
啟湯以至仁。伐至不仁。何至慮其降敵而行孥戮之重法。以劫其
眾。或曰戮辱也。孥與奴同。罪隸也。蓋不用命者身既被刑。其妻子
又沒入爲罪隸。以戮辱之也。然以上句證之。不應一戮字而二義。
若云不用命辱于社。有此理乎。且詩云樂爾妻帑。孟子云罪人不
孥。豈皆可作奴字解耶。蔡傳駁之允矣。蔡傳又謂禹之征苗。止曰
爾尙一乃心力。其克有勛。至啟乃曰孥戮。湯又益以朕不食言。罔
有攸赦。此可以觀世變。蓋亦疑其言之過當。不知此非啟與湯之

言書經傳寫竄亂失其真也。夫血流漂杵，孟子辨之，慮開後世殺戮之端耳。然猶指殺敵及敵人之自相殺也。若孥戮則殺從征者之家屬矣。視漂杵之辭，尤慘酷害理。孟子必不舍其大而辨其細，其不及此者，知書之本文不若是也。抑又聞之，湯武革命，順乎天而應乎人，湯誓曰：有夏多罪，天命殛之。順天也。乃又曰：我后不恤我眾，舍我穡事而割正夏。又曰：夏罪其如台？是民皆不樂從湯，且怨湯也。尙得曰：應乎人乎？孔子曰：使民以時。孟子曰：不違農時，湯之割正夏，未有奪民穡事而興大眾者。且君子信而後勞其民，未信則以爲厲已，以不教民戰，是謂棄之。湯豈未信而勞不教而戰者乎？不然，何從得此怨咨也？湯一征自葛始，四海之內皆曰：非富

天下也。爲匹夫匹婦復讎也。湯能信於四海之民。何獨見疑於畿內之民。以晉文之圖霸。猶曰民未知義。民未知禮。民未知信。必民心洽而後用之。湯桀非常之局。以伐夏救民。曾晉文之不若乎。此皆理之不可信者。近儒攻古文。尙書於今文則曲爲之說。此門戶之見也。吾以孟子之說推之。而決其不可盡信者。此爲尤也。

金縢說

金縢爲僞書明初王應麟論之矣謂公既卻二公穆卜以爲未可
戚我先王乃私告三王自以爲功此儉人佞子所爲也死生有命
今以身代死是爲不知命且人子有事於先王而可以圭璧要之
乎旣別爲壇墠則不於廟中明矣乃私告也周公人臣也何得以
私告之冊藏於宗廟况武王疾瘳四年而崩周公居東二年乃復
周人尙卜豈有朝廷六年無事而不啟金縢者其說辨矣袁氏校
繼之逐條抉摘不遺餘力其說尤辨且精雖註家援孺子在膝下
之詞爲公解究莫可解也雖然論者知金縢之僞而未知作僞者
何人其人爲誰劉歆是也歆胡爲作僞成莽篡也史稱莽借六藝

以文奸言公孫祿稱歆顛倒五經使學士疑惑其罪當誅蓋自向校遺書歆序七略因竄亂經文作僞以逢莽之惡其僞作明堂位文王世子及其增竄周官儀禮戴記家語史記方氏苞辨之詳矣方氏謂莽之竄無事不託於周公其居攝也羣臣上奏稱明堂位以定其儀故所記皆與莽事相應其稱周公踐天子之位朝諸侯於明堂以莽踐阼背斧依南面而朝羣臣也其篇首曰昔周公朝諸侯於明堂之位天子負斧依南鄉而立易周公以天子與當日羣臣所奏周公始攝卽居天子之位語相證也其稱夢帝與我九齡則以莽稱天公使者見夢亭長曰假皇帝當爲眞故僞附此記以示年齒命於天夢中得相與則亭長之夢可徵也其稱文王十

三生伯邑考則因平帝年十有二。莽欲以女配。故歆先竄此於大戴記。見文王始婚亦年十二也。其他莽之亂政。皆分竄於周禮六官中方氏於周官之不類者。既辨而削之。并刪文王世子篇。又辨儀禮大戴記家語史記世家荀子賈子之被增竄者。其能辨古書之正僞。識不在昌黎下。惜未悟金縢亦歆所僞爲。不特未嘗辨正。反引王與大夫盡弁以證成王之年非甚少。且曰。幸而金縢之篇尙存。不然。歆之怪變。竟無從得之。烏虜方氏以金縢傳自伏生。始出。卽列於學官。歆未必敢譌張爲幻耳。不知書經秦火出自壁藏。中傳自女子之口。武帝時雖置博士。而自一二經師外。傳之者寥寥。歆文學足濟其奸。又益以莽之權勢。人卽知其僞。孰敢訟言攻。

之莽嘗恐海內儒生或議其僞乃特徵天下有逸禮古書毛詩周官爾雅天文圖讖鐘律月令史篇文字者並詣公車至者以千數皆令記說廷中使歆典校而頒布之卽有知伏生本文者且謂歆所增竄或出於廷中記說而疑古書所傳或本有是也用此金縢遂得列二十九篇中至今不廢雖識如方氏能辨周官儀禮戴記史記之增竄而於此不敢置疑是歆之奸僞汔今千八百年未全破也然當時已有灼知其僞者故公孫祿痛斥之班史亦以借六藝文奸言罪莽又幸其情辭鄙倍絕不類周公所爲故王氏袁氏之徒各據理辨之雖百喙不能爲之解殆天奪其魄畱罅隙以俟後人之糾正歟烏虜近儒攻古文尙書者眾矣而金縢在今文中

類弗深考則信乎六經非一世之書而亟索解人不得也

案史記魯世家載武王不豫周公禱三王武王有瘳公藏策金
縢中與尚書合後又云成王少時病周公乃自揃其蚤沈之河
以祝於神曰王少未有識奸神命者且也亦藏其策於府成王
有瘳及成王用事人或譖周公公奔楚成王發府見周公禱書
乃泣反周公後又云周公在豐病將沒曰必葬我成周以明吾
不敢離王公卒成王葬之於畢以從文王秋未穫暴風雷雨禾
盡偃大木盡拔成王與大夫朝服開金縢書得公所自以爲功
代武王之說王執書泣曰昔周公勤勞王家惟予幼人弗及知
今天動威以彰周公之德惟朕小子其迎我國家禮亦宜之王

出郊天乃反風禾盡起於是賜魯以天子禮樂以褒周公之德是史記分書語爲兩事蓋亦劉歆所竄亂也公前代武王死復代成王何慣於代死若是耶荆舒周公所懲者也公方且膺之乃不奔魯而奔楚何耶至公欲葬成周王葬之於畢事見逸周書然與風雷示變開金縢無涉且公卒矣出郊親迎者復誰迎乎此不可通者也攷王充論衡並載二說史記蒙恬傳曰昔周成王有病周公自揃其爪以沈於河曰王未有識是旦執事有罪殃旦受其不祥乃書而藏之記府及王能治國有賊臣言且將爲亂王大怒旦走而奔楚王觀於記府得旦沈書流涕曰孰謂公欲爲亂乎乃殺言者而反公旦漢書梅福傳云昔成王以

諸侯禮葬周公而皇天動威雷風著災後漢書周舉傳云昔周公攝天子事及薨成王欲以公禮葬之天爲動變及更葬以天子之禮卽有反風之應張奐傳云昔周公葬不如禮天乃動威是諸說者果孰是而孰非乎又案洪範五行傳曰周公死成王不圖大禮故天大雷雨禾偃木拔及成王瘞金縢之策改周公之葬尊以王禮申命魯郊而天立復風雨禾稼盡起尙書大傳曰周公疾曰吾死必葬於成周周公死天乃雷雨自風禾盡偃大木斯拔國恐王與大夫開金縢之書執書以泣曰周公勤勞王家予幼人弗及知乃不葬成周而葬之於畢凡此皆本史記後說也白虎通亦然夫盡信書不如無書孟子已有此論又更

秦火經籍歆竄亂無怪羣言淆亂人人殊也譙周云秦既燔書
時人言金縢之事失其本末益見其不可盡信耳况尙書大傳
伏生所作也今文尙書亦伏生所口傳何應自相矛盾至是益
可見書被劉歆竄亂非伏生原本矣竊意武王既喪以下四節
當係書本文別有歸宿作僞者刪節本文而增竄其前後以神
其說耳此可以理斷者也

又按戴氏鈞衡解未可以戚我先王謂戚卽於我心有戚戚焉
之戚趙岐注動也蓋僅卜未可以動我先王故特爲壇墠冊告
而後卜耳果爾公胡弗與二公共爲壇墠冊祝以動先王而必
自以爲功乎召公亦姬姓或曰文王幼子也獨不可以同禱乎

姚氏彌謂爾爲祝史之常辭惟巫史之體旣然故廟中得託其
稱詩曰莫匪爾極爾后稷也實爲爾公允師爾武王也不必如
蔡傳作人子膝下之辭也管氏同謂古人不以爾汝爲卑稱詩
云天保定爾俾爾彌爾性用之於君也詩曰旣昭假爾禮曰假
爾泰龜有常用之於鬼神也其說似已余謂詩體限於四言故
不能不稱爾亦不能不自稱我然辭氣溫婉未有如爾之許我
爾不許我云云之鄙倍者至假爾龜筮視告先王則有閒矣今
以詩有莫匪爾極旣昭假爾之文遂以爲禱先王可稱爾之證
然則詩有克昌厥後駿發爾私之文豈即可爲周人名終不諱
之證乎或又謂我乃屏壁與圭屏者藏也藏壁與圭不敢復有

所請耳瀆則不告道本如是也然公既竭誠以禱至不自愛其死則必哀痛迫切以求其許何必以許不許並陳耶不許則藏圭璧此不待言者也言及此則情轉泛意轉緩矣不能曲爲之解也總之此數節辭氣鄙倍其經僞竄無疑安得以今文故獨爲之迴護耶

關雎說

說關雎者言人人殊於夫子所云哀而不傷之旨率牽強不相入
集傳謂求之未得不能無寤寐反側之憂求而得之宜其有琴瑟
鐘鼓之樂夫寤寐反側思也非憂也憂也抑非哀也其何傷之有
集傳又謂極其哀樂而皆不過其則夫思至於哀則已過矣尙何
則之有小序曰哀窈窕思賢才此古訓也然使但爲妃匹計則第
思窈窕耳胡哀爲故必先知文王后妃之本末然後能得關雎之
解且可得聖人哀樂之解也夫關雎一詩爲文王繼娶太姒而作
也於何徵之於大明思齋諸詩徵之也詩曰思齋太任文王之母
卽所謂摯仲氏任生此文王者也曰思媚周姜則指文王元妃姜

氏也。蓋文王初娶亦姜氏，不獨前有太姜，後有邑姜也。思媚猶思齋，非謂太任之媚於太姜也。果指太姜，則不應稱周姜。太任爲婦，太姜爲姑，豈有尊稱其婦而獨殺於其姑之理？其曰京室之婦，蓋文王方爲世子，未卽位而周姜卒，故止稱京室婦，明其未爲國妃也。曰太姒，嗣徽音，則姜氏卒而姒氏繼之，嗣者繼也，猶其言纘女，維莘也，纘亦繼也。曰則百斯男，則姜氏止生伯邑考，及繼娶太姒，乃生武王。周公及管蔡康誨諸叔季也。曰長子維行，篤生武王，武王實太姒長子，子以母貴，故文王舍伯邑考而立武王也。說者以姒氏爲莘國長子，支離甚矣。凡此非凡說也。詩固明言之矣。其曰文王初載，天作之合，在洽之陽，在渭之涘，大邦有子，親迎于渭，指

初娶之姜氏也。國君十五娶而生子。古雖不盡然。計亦在弱冠前。故曰初載也。旣曰有命旣集。又曰有命自天。命此文王于周于京。續女維莘。明乎其爲繼娶。故更端言之。更迭舉之。若均指太姒。不應言重而詞複也。且洽渭與莘地勢渺不相屬。明其爲兩人兩地也。凡人之情。當少小時。縱有室家之慕。必不至寤寐反側。蟬蛸之詩。人譏懷昏姻者。爲無信。不知命聖人。豈若是乎。况文王之爲世子。朝於王季者。日三雞初鳴而盥漱。問視又何暇及此乎。惟當嗣位後。開國承家。中年喪偶。任重而勢孤。苟不得聖女以嗣徽音。則無以奉神靈之統。故哀情不能自抑。哀則思。思則求。求而得之。宜其有琴瑟鐘鼓之樂也。序云哀窈窕思賢才。正謂哀逝者而思繼。

續者耳。第詞意引而不發。故說者胥失之。且夫文王受命惟中身。厥享國五十年。年九十七。乃終。計其卽位。蓋四十七八歲矣。又終王季之喪三年。然則太妣來嬪。文王年蓋五十矣。當元妣初逝。內政無所統屬。於是妾媵皆哀其無以共承宗廟。幸而得妣。乃作此詩。蓋嬪御之倫。深知文王之隱微。寤寐故能爲此言。亦性情之正所感也。然古無未立后。妣先有妾媵者。若非太妣爲繼。妣則方其初載。作合安所得魚貫之宮人。其人又安能備知主君之隱曲。一至如此。故惟先有周姜。則妾媵之同侍文王者。且數十年。故能言之親切若此也。明乎此。而後哀而不傷之義。爲可通。而大明思齋諸詩。亦豁然見真面矣。

少讀姚姬傳經說有云文王受命惟中身其卽位蓋四十七八歲矣又終喪三年當太姒來嬪文王蓋五十矣未知其爲世子有妻而亡之與抑求聖女之難竟未有夫人與因此反覆推求知太姒必非文王原妃然不證以大明思齊二詩仍無確據也後晤張力臣觀察言中州蔣子瀟論關雎正主此說屢求其書不可得光緒丁丑乃得子瀟集讀之爲之大快第蔣說人不盡知且係箋注體不便讀前因彙括爲此文以表章之

姬傳又云文王五十而娶太姒篤生武王文王崩時武王蓋四十六七矣又十三年而伐紂年可六十故告周公曰維天不饗殷自發未生至於今六十年又六年而崩蓋武王壽止於六十

六故周公陳無逸不及武王謂武王九十三而終者王莽令劉歆所竄亂之妄說也

將仲子說

將仲子刺段也。序以爲刺莊公。蓋段失道而公弗制。刺公正以刺段。下二章序皆以爲刺莊公。意亦如此。特辭未盡耳。集傳以爲淫奔者之辭。今取其詩繹之。其曰無踰我里。無折我樹杞。豈敢愛之。畏我父母等語。卽作男女之辭觀。而其不惡而嚴。與無感我睨兮。無使尨也吠。同一止乎禮義。淫奔者能爲之乎。乃集傳於召南則曰其凜然不可犯之意可見。於此章則指爲淫奔。豈在二南則爲貞在鄭必爲淫歟。究之皆非也。蓋刺段而止其篡也。毛傳謂指蔡仲亦非也。鄭武公娶武姜。生莊公及其叔段。則段正仲子也。稱叔者從其封號。稱仲序其行次也。段命西北鄙貳於己。又收爲己邑。

至於廩延又繕甲具乘將襲鄭武姜將啟之國人知其謀也久矣故刺而諷之曰無踰我里言段既居京京之外皆非其有不得侵軼鄭之疆里也踰牆猶言短垣不可踰也踰園猶踰牆也曰折杞折桑折檀猶所云落實而取材也曰畏我父母言仲子有母在謀敗則憂及父母後卒有城頴之寘也畏我諸兄謂莊公也公正仲子之兄也畏人之多言謂段之心路人皆知之不能如昔之曲沃我聞有命不敢以告人也義本明白正大合下二章觀之益見烏得謂無與於莊公叔段之事耶集傳泥於鄭聲淫之說舉風雨青衿蔓草將仲子諸詩不淫者槩誣以爲淫豈篤論哉

檀弓說

檀弓文義簡奧，後儒誤讀誤解者多。如孔子少孤，不知父墓一章，聖人人倫之至，斷無踰冠尙不知父墓之理。司馬遷作史記，創爲野合之誣，謂顏氏諱而不告，鄭注因之，尤爲悖謬。惟近人高郵孫濩孫之說曰：檀弓未爲失讀，檀弓而不明句讀者之失也。此當以不知其墓殯於五父之衢，十字爲句。蓋淹柩爲殯，淺葬亦爲殯，殯者掘殯厝之，畢塗其上，故有似乎葬也。孔子生三歲而孤，顏氏早歿，淺葬其夫於五父之衢，欲待將來改卜而與已合葬也。至是顏氏卒，孔子欲從周人合葬之禮，卜兆於防，惟以父墓淺深爲疑。蓋殯淺而葬深，彼時年幼，旣未臨其穴，事隔二十年，欲遷柩合葬於

他所則未知向者之果爲殯乎爲葬乎如其瘞在淺土禮應遷而合葬也若已成乎其爲葬則先人體魄安此已久未敢造次以取戾故必博訪而詳問之其愼也蓋謂夫子再三審愼不敢輕啟父墓也維時閱歲已久凡及見其事者恍惚莫能詳皆曰鄒大夫已葬於此也獨曼父之母言其爲殯然後知當日是殯而非葬既有此徵乃得合葬於防矣愼當讀如字鄭注改讀引去聲改經以就我此大失也又孔子旣得合葬於防章封之崇四尺先反而墓崩因泣然流涕曰古不修墓解者謂孔子自傷不能致謹於修築致因雨而崩且言古人所以不修墓者敬謹之至無事於修也如此則聖人不能愼終厥咎重矣樂平鄒鳳池曰孔子之於禮從殷從

周皆斟酌古今而行之。殷人墓而不墳。不墳則不慮其崩。亦無待於修。此殷人尙質之俗。亦欲順地道安靜。不欲驚其體魄也。孔子非不欲從殷制。自度他日不免從事四方。因從昭伐邱封之制。當封時。亦既崇四尺矣。其先反也。修虞事也。以餘功屬之。門人不料雨甚而崩也。墓之崩。非繇築土之不堅實。因驟雨之淹潰。門人卽時修之。而後反度其崩。亦未甚耳。夫子聞言驚泣。而曰古不修墓。蓋古人所以不修墓者。以其不墳也。今以墳之故而崩。以崩之故而修。子蓋自悼其不能從殷。致有違禮之事。因以知墓而不墳。古人固有深意也。此章以吾聞古者墓而不墳。吾聞古不修墓爲起。訖其義甚明。讀者自不察耳。又伯魚之母死期而猶哭。章解者因

孔子謂其已甚。遂謂孔子出妻。又因門人問子思曰。子之先君子喪出母乎。遂謂孔氏三世皆出妻。此必無之理也。豐城甘紱曰。子之先君子喪出母乎。此指孔子於前母施氏言。非謂伯魚之於升官氏也。蓋叔梁公初娶施氏。生九女。無子。正所謂無子當出者。家語後序所謂梁公始出妻是也。施氏無子而出。乃求婚於顏氏。生孔子。孔子雖有兄孟皮。乃妾母所生。又以足疾廢。則孔子實爲父後之子。禮爲出母齊衰期。爲父後者則無服。周道尊尊。其制然爾。殷道親親。雖爲父後者猶服之。聖人以義起禮。父既不在。施氏非有大故。不幸無子而出。實爲可傷。故孔子爲之服期。蓋用殷制也。門人之問。明曰子之先君子喪出母。是謂夫子自喪出母。非謂令

伯魚爲出母服也。子思云：吾先君子無所失道，謂前母因無子被出，故寧從其隆而爲之服。設有他故被出，則當從其污，不爲之服矣。所謂無所失道者也。若伯魚之母死，當守父在爲母期之禮，過則當除，故抑其過而止之。惡得誣爲喪出母耶？是三說者並有功聖門，足破千古之惑，抑可見六經非一世之書，前賢實有藉於後人也。故特表而出之。

檀弓說二

檀弓誤解者多。亦有傳聞失實者。如曾子責子夏喪明。非情理所宜有也。子夏嘗爲魏文侯師。年不下百歲。老而目盲。世所常有。適有喪子之戚。遂傳其因喪子而喪明。傳之者過也。師曠師冕。左邱明之徒。未喪子。亦喪明。其又何說。禮毀不危身。未聞毀可喪明。高子羔執親之喪。泣血三年。未聞遂喪明也。曾子少孔子四十六歲。其父曾皙與子夏共學聖門。子夏曾子之父執也。方往弔時。曾子哭。子夏亦哭。情之至也。子夏呼天而稱無罪。亦人窮呼天之常態耳。曾子遽怒。遽斥其名。而數以三罪。呼汝爾者。十臨之。若父師然。曾子平日篤厚而謹慤。出辭氣遠鄙倍。必不以是加諸父執也。昔

者原壤之母死登木而歌夫子爲弗聞也者而過之曰親者無失其爲親故者無失其爲故以全交也狸首之歌與無罪之哭孰輕孰重夫子嘗以杖叩原壤而於此獨容之曾謂曾子遽出此乎將不以子夏爲親故乎弔人之喪忽而數人之罪前哀後倨使人弗堪則何如弗弔邪且其所云三罪亦未當夫子爲生民以來所未有子夏豈不知之其設教西河必不敢以夫子自居也卽西河之人尊之或過亦不足爲子夏罪昔諸弟子以有若之言似夫子欲以所事孔子者事之強曾子曾子不可未聞罪有子也何獨以此罪子夏親喪固所自盡也豈必欲使民有聞卽如檀弓所稱顏子善居喪高子羔之執喪君子以爲難衛之送葬者孔子以爲善

獻子之禫。孔子以爲加人一等。敬姜之哭。孔子以爲知禮。以及將軍文子之中於禮。延陵季子之合於禮。皆有聞於民者也。然豈有意使之聞哉。有意使聞。是因喪以爲名也。若喪子而喪明。則適逢其會。更非其罪矣。檀弓記此。蓋欲表曾子之直諒。子夏之服善。而不知誣子夏并誣曾子也。蘇子瞻謝疊山楊用脩諸家並好檀弓。第就其文論耳。若其義理之失。蓋不可枚舉。而此章尤甚。讀者其詳辨之。

檀弓記曾子易簣亦理所必無之事。禮天子之席五重。諸侯三重。大夫再重。席有等級。而簣無聞焉。簣乃衾棚帷帳之屬。有精粗無貴賤。果爲大夫之簣。季孫雖賜曾子。必不受矣。曾子臨終

啟手足曰吾知免夫自問無遺憾矣若僭臥大夫之簀必待童子正告而始知不猶有遺憾乎儻童子不告不幾不得正而斃乎此蓋因啟手足數語附益之而失其實也必不可信

周禮媒氏說

地官媒氏中春之月令會男女於是時也奔者不禁方氏苞謂此劉歆所增竄也禮謹男女之制若會焉而聽其自奔雖暴君污吏能布此爲憲令乎蓋王莽時坐私鑄沒入爲官奴婢者以十萬數至則易其夫婦民人駭痛故歆增竄媒氏之文見周官之法官會男女而聽其相奔則以罪沒而易其夫婦猶未爲已甚也其說似矣然歆所竄亂固多此卻爲其本文特解者誤耳汪氏中曰會計也讀若司會之會男子二十而冠有爲人父之道女子十五許嫁有適人之道媒氏令男三十而娶女二十而嫁所謂禮言其極亦不是過者也霜降逆女冰泮殺止至仲春則過時矣凡男女自成

名以上媒氏皆書其年月日名焉。於是計之則其年與其人之數皆可知也。其說與梁氏鴻壽合。獨奔則不禁則仍誤解。不及梁氏之確。梁氏曰。會讀若惟王不會之會。謂會計其數。非令其合會也。蓋男女自成名以上。媒氏既書其名矣。娶判妻入子則又書之。是匹夫匹婦其嫁娶具書於媒氏中。春會男女。謂會計其未嫁娶者。令其及時嫁娶也。古者女子有罪爲人妾。而內則云奔則爲妾。蓋嫁娶而禮不備。謂之奔。以其六禮不備。故卑之也。奔者不禁。謂其時已過。不責以備六禮耳。聖王豈導人以淫奔哉。較汪氏所云。著之令以恥其民。使及時嫁子娶婦者爲優矣。汪氏引禮月令爲徵。仲冬之月。農有不收藏積聚者。馬牛畜獸有放佚者。取之不詰。非

教民盜也。著之令以懼其民。使及時收斂耳。然以速其嫁娶。故遂縱之使奔。雖曰恥之不適以導之淫哉。故當以梁氏說爲定。烏虜經一也。合數家之論。而其說時有未盡。則信乎六經非一世之書。讀者當擇善而從之也。

雜說三首

超園主人蓄文魚數十頭以盆爲沼疊奇石爲島嶼上蒔佳卉望之蔚然蒼秀魚游島嶼中窮日夜不息客曰樂哉魚乎彼自謂入江湖濠濮間日踔數百里無窮期也主人曰嘻是終不離故步耳所居不出盆盎所知見安能出盆盎哉天下大矣義理匪一端矣人智識各有所囿或囿於見聞或囿於氣習或囿於專己自足繇君子觀之皆盆盎之智耳古稱井底蛙又稱坐井觀天皆此類也客曰善哉吾於觀物悟器識之宜焉

主人在軍中掘濠得古戟苔繡斑然察之異常材加砥礪焉其鋒可剗犀兕他日又得古銅鏡形圓土花剝蝕過半役人將棄之急

命磨以元錫光爛然鑑及毛髮客至出以相眎客太息曰戟若鏡非昨鈍而今利昨闇而今明也遇不遇故耳天下豈乏環材哉沈於沙瘞於土識之者難耳主人曰管子不云乎蛟龍得水而神可立虎豹得山而威可載物必待遭其時也使管子不遇鮑叔牙死纍囚久矣戟鏡云乎哉

主人山居有以泰西火器見貽者器長不及尺火不然自熱疊發若循環客見而嗟異之主人愀然曰宇宙之殺機殆日甚一日乎古者不得已而用兵干矛耳斧戠耳自火器興雖萬夫之勇當之輒糜碎不圖精利更及此也烏虜三代以下琴瑟簫管之器數糊槌簠簋之名物日失日亡而殺人之具乃日加利吾惡知世變所

終極哉

天岳山館文鈔目錄四

平江 李元度

次

碑

儀禮士昏禮入門當碑揖禮記祭義牲入麗於碑賈氏注云凡宮廟皆有碑以識日影知早晚說文注云古宗廟立碑繫牲後人因於其上紀功德秦漢以來始謂刻石曰碑文章辨體謂碑始於李斯嶧山之刻文章緣始謂漢惠帝爲四皓立碑高車山然吾聞無懷氏封泰山刻石紀功崆峒山中有堯碑禹碣皆篆文則不始於秦矣劉彥和曰碑者裨也上古帝王紀號封禪樹石裨岳故曰碑也周穆王紀績弇山之石亦古碑之濫觴又曰宗廟有碑事止麗牲未勒勳績而庸器漸闕後代用碑以石代金同乎不朽自廟徂

墳猶封墓也蓋自是碑遂用之於墓道矣

歐陽公曰後漢以來始有冢墓碑文而門生故吏亦相與立碑頌德孫氏何曰碑非文章之謂也後人假以載其銘銘名也述其功美始可稱名也銘之不能盡者復前以序編錄者通謂之碑文余爲此體凡二一廟碑一墓碑代作者亦附焉

漢魏人作碑誌本文中不入撰人名集中入撰人則自稱名用韓退之法也韓碑體近西漢平淮西則上擬書詩然自平淮西外餘皆廟碑及曹成王諸達官之墓碑耳至李習之作高愍女碑始表揚節烈下及窮閭女婦之微所謂表一人而天下勸也

蘇子瞻表忠觀碑全錄趙抃奏議卽綴銘辭此漢碑常例也柳子

厚壽州安豐縣孝門銘亦用其例章氏學誠曰原奏未必如此古雅史家原有點竄剪裁之法第文辭可以改竄制度則必從時篇首臣抃言篇末制曰可雖與孝門銘篇首壽州刺史臣承思言篇末臣昧死上請制曰可同仿史記丞相臣斯昧死言及制曰可等語然非唐宋時奏敕體也奏敕自有當時公式若過求古雅則臣抃言三字何如岳曰於制曰可三字何如帝曰俞乃舍唐虞而法秦漢安見其能好古耶

又曰汪堯峰撰睢州湯烈婦旌門頌其序全仿孝門銘及表忠觀碑篇首巡按御史臣粹然言篇末臣謹昧死以聞究屬非法蓋近代章奏篇首繫銜無不稱姓者粹然何姓豈可因摹古而刪之又

三才圖會卷之四
銜名之下必書謹奏無稱言者一語僅四字已兩違公式矣婦人
有名稱無名稱姓此通例也近世案牘之文往往舍姓而空稱
曰氏甚有稱該氏者尤爲俚俗不典汪氏於一定之公式改從秦
漢而反沿陋俗稱氏不亦愼乎余案此論似苛而實正文章家不
可不知

袁簡齋曰碑誌標題應書本朝官爵昔人論之詳矣然亦不必泥
如昌黎作權文公神道碑應書同中書門下平章事而以故相二
字標題作劉昌裔碑應書檢校尚書左僕射云云而以統軍二字
標題震川作沈璧墓誌應書建安縣知縣而以建安尹標題猶之
史記標題忽稱魏公子忽稱平原君也至序官有從古稱者如

城以金吾衛大將軍扈駕而權文公碑稱以大司馬翼從奚陟卒
贈禮部尙書而劉禹錫碑稱追贈大宗伯宋子京馮侍講行狀稱
大理寺爲廷尉平之類皆古稱也有從俗稱者如李珣牛僧孺碑
稱宋申錫貶郡佐郡佐者唐時之司馬也昌黎鹽法條議稱院監
巡院院監巡院者唐時之度支使鹽池監也永叔之桑梓傳稱閣
職閣職者宋時之六部架閣也伊川作明道行狀稱漕司漕司者
宋時之發運使轉運司也皆從俗稱也余按金石文字寧謹嚴毋
通脫凡從俗之稱可避者避之不得已而用諸議論文中猶無害
也敘事而沿大司馬大宗伯之稱則萬不可

又曰碑傳標題必書本朝地名亦昔人所論也然廬陵作李公濟

碑稱南昌爲豫章不稱隆興震川作王震傳稱震爲京兆尹不稱
應天府尹則行文亦難泥論序地名有用省字法者如廬陵伊仲
宣誌銘稱歷知汝州之葉鄭州之滎陽均省卻一縣字東坡趙康
靖碑稱呂溱守徐蔡襄守泉趙小二寇廬壽介甫王比部墓誌稱
願得蘇常閒一官南豐錢純孝墓誌稱爲尉於秀婺鄧云云均省
卻一州字余案省字之例尙可仍至敘事則地名必從時制

敕建平江縣忠義祠碑

宗祠碑

家廟碑

敕建曾文正公

祠碑

敕建賂潘張三公祠碑

敕建劉忠壯公祠碑

湖南

省城隍廟碑

河泊塘新建屈子廟碑

昭顯真人廟碑

明

蘄國武康康公廟碑

前永州太守楊公生祠碑

李烈婦吳

氏殉節碑

重修宋君子萬子靜先生墓碑

凌氏族姓重修

遠祖清海公墓碑

先世父暨先府君合葬墓碑

天岳山館文鈔卷四

敕建平江縣忠義祠碑

咸豐十年七月己未 欽差大臣兵部尚書右都御史兩江總督
臣曾國藩奏言臣伏見軍興已來

皇上褒崇節義凡臣工將卒死職死綏輒予 贈卹 賜祠諡有

差其有一軍一邑死事獨多若湖南水師立祠江西之湖口湘鄉
士民請建忠義專祠皆得 旨俞行所以激揚而褒顯之者甚厚

平江介江鄂之衝爲湖南行省東北門戶方賊據通城義甯蹢躅長
沙巴陵湘陰率與平接壤邑人士力戰固圉復應募爲義兵出境
搏賊若江若楚若宣歙吳越閩粵州黔凡楚師轉戰地平人率負

戰爲軍鋒前後死綬者二千六百有奇。烏諱烈矣。邑學宮例設忠義祠。地隘不足安眾靈。署知縣陳鳳舞牒請建專祠。卜地興築。會鳳舞卒。事幾寢。邑人按察使銜溫處兵備道李元度集貲潰成拓祠基而大之。治其庭壇翼以東西序。神厨庖湏皆具。中祀領兵官四人曰。贈太僕寺卿知府銜湖北候補同知直隸州知州何忠駿。贈總兵銜謚壯節候補游擊童添雲。五品銜候選知縣李原濬。候選從九品黃錫宇。東西龕祀武生候補把總李傳琛等六十有七人。兩廊祀義勇劉滙湘等二千五百五十有三人。購祀田三百畝。籍其歲租供牢醴之用。且以時修葺。請眠湖口湘鄉成例。敕下所司列入祀典。命守土官春秋致祭。用妥忠靈。垂示永

久屬邊烽未靖。邑人士赴敵者多。脫不幸繼有死者。請具上其名。以次祔祀。以稱朝廷表章忠義。勵世磨鈍之意。謹與巡撫湖南都御史臣賂秉章合辭。附驛以聞。得旨如所請。於是平之士民聞命感踊。筮日逆主入祠。鑊蕭殷雷。高管噉噪。幢牙廳肅。合沓琴麗。旄倪夾道。額手嗟喟。具道。

天子恩德嘉勞死事之臣。至優且遠。既贈崇秩。廕及嗣人。復永報以俎豆。死且不朽。煒哉茲足慰鬼雄而扶人紀矣。乃爲迎神送神之詩。俾工歌以祀焉。詩曰。

汨之江兮水瀾瀾。懷沙自沈兮哀屈子。左徒去兮二千年。嗟眾靈兮鬱起。靈之來兮洋洋。歆荔丹兮蕉黃。翩然下擊兮披髮大荒。朝

容與於蒼梧兮夕弭節於羅國。旦妖霧兮江南北。目眚裂兮手拳。
握誓爲大厲兮搏賊靈之去兮。遲遲驂赤豹兮駟文螭。排闥闥兮
吐虹霓。元精耿耿兮騎尾箕。招忠魂兮賡楚辭。

宗祠碑

古者大夫適士官師皆得立廟而以宗子主祭故有百世不遷之宗三代後仕者不世祿而宗法廢雖貴爲大夫猶祭於寢乃設宗祠以合祀其始祖或始遷祖俾族姓不忘所自出猶有宗法之遺意焉然古制有爵始有廟其有爵者亦止祀及二世三世至四世止耳若歷世以次祔祀實與古法不相應自程子以義起禮謂人本乎祖時祀宜逮高曾冬至宜祀始祖近代遂因之不變此論出而追遠之忱益無憾矣

國朝會典定品官家祭之禮於居室東立家廟以四室奉高曾祖櫨高祖以上親盡則祧藏祧主於東西夾室其餘以次而差

聖朝錫類明倫典至備也。然于姓繁者或不能家立一廟。於是列
合族人立始遷祖祠。以次祔祀。春秋合祭。以序昭穆。則於敬祖中
又寓收族之義。固議禮之君子所許也。吾李氏自碧山公諱承永
石晉天福二年由江西建昌遷平江。卜居埤山。實爲始遷祖。又八
世爲仁昭德昭可昭勝昭公及綱純二公。爲五房。今蕃衍布濩於
平者皆五房子姓也。宋西坪公賓王以進士官司農少卿祀鄉賢。
仲秉公儒用以進士官制幹。受業朱子之門。學者稱練溪先生。爲
邑九君子之冠。自後舉甲乙科以宦蹟學行著者肩頂相望。邑中
稱右族焉。埤山舊有祖祠。燬於兵。乾隆癸酉族先正建宗祠於北
城。迄今百有八年矣。歲久弗葺。榱棟且傾。族父老有事於祠。願瞻

咨嗟迺謀曰舊祠牖樸不足以揭虔妥靈而又桷椽侈剝不治木
主黝昧大思弗稱堂構稽國典五品以上得立廟今吾族仰承
廕庥用科名政績軍閥起家者官自五品迄二三品僂指不能畢
數法當易祠而廟於是革故取新拓舊址數百弓爲廟五楹祀始
遷祖昭左穆右以次祔中建敕書樓尊藏誥敕東西序翼以
修廊庑祭器及饗牒後有堂爲與祭者秩事之所爲門三爲級五
蔽以屏牆崇閣嚴翼工始於咸豐九年五月落成於十年十一月
費緡錢萬一千有奇增置祭田歲入租三百石以垂遠久維我族
眾均力一心不戒用勸廟成肇祀宗祊咸序登降受胙耄艾嘆嗟
乃惟曰侯其禱哉茲足妥先靈而芑賴吾族矣是舉也考之禮經

衷之儒先定論上稽昭代之典制以求合西坪練溪諸公承先翼後之心義皆有當允宜昭示來茲謹識其巔夫而系之以詩詩曰

觥觥我祖自晉遷平劬躬燾後襲美樹聲爰逮五公如枝連理孝弟力田雲仍鬱起宋有西坪亦越練溪名卿碩儒俎豆尸之達人朋生世引弗替耿耿社哉有秩斯繼曰際

熙朝厥聲隆隆文被剡章武薦峻功偉茲後禩襲邵明德豈繫其才惟祖之澤城北通衢舊有崇祠歷祀維百懷崩級夷粵議鼎新如響斯應期月告成旄倪謳詠翼翼新廟孝孫之爲順勢卽宜以諏以龜以平其巖植屋增庠孝孫來享來薦新廟於室於堂光遠

有耀有牲斯瞻有酏斯清駿奔止止咸慶厥成念我宗功陟降庭止勛我後人報本返始匪本曷思匪源曷追刻詩牲繫以永厥垂

家廟碑

今宗祠遍天下矣然於時王之制則未協也伏讀

大清會典通禮凡品官家祭於居室之東立家廟一品迄三品廟五間中三間爲堂左右各一間隔以牆北爲夾室南爲房堂南檐三門房南檐各一門階五級庭東西廡各三間東藏遺衣物西藏祭器南爲中門又南爲外門左右設側門堂四室奉高曾祖禰四世南嚮高祖以上親盡則祧藏主於夾室歲以四仲月致祭每案俎鉶敦各二籩豆各六牲用羊一豕一自四品迄九品其制有差蓋秩無論崇卑家必立廟各祀其四世雖兄弟不能合也今人不能皆立廟乃合祭其始遷祖雖與古宗法相近而實不同蓋祠不

與寢相連屬則神不依人又祀至數十世以上旁親皆得入主族
姓無賢愚貴賤並得執鬯以將事自非立專廟於家各祭其所當
祭祧其所當祧詎有當於從周之義哉吾族宗祠在縣治北祀始
遷祖碧山公既增其舊制矣同治七年三月元度帥師平黔東教
匪蒙

恩起雲南按察使軍功隨帶加四級

覃恩誥贈先曾祖錦林府君先祖星垣府君先考小卿府君皆爲
光祿大夫曾祖妣余祖妣徐皆爲一品夫人母氏喻封一品太
夫人惟高祖石君府君例不獲貤贈乃援推廣例繇國子生追授
光祿寺典簿高祖妣曾贈孺人時元度以母老請解官歸養

詔曰可六月歸里乃攷會典通禮建家廟居室東堂室房廡如制
越明年正月廟成會

制書至乃用新階題神主肇祀四室於堂行焚黃告祭禮既訖事
謹拜手稽首爲之記曰祖宗者吾形氣所自來也分父祖之形氣
以有吾又分父祖之形氣以有兄弟伯叔皆一氣所衍也等而上
之吾父祖實分始祖之形氣以有其身吾始祖又分厥初生民之
祖之形氣以有其身今雖莫舉其名諱然形已倣而氣相承氣者
何吾今日之一呼一吸是也吾之一呼一吸卽吾父祖之呼吸卽
吾始祖之呼吸卽自有天地以來始初之祖之呼吸使中有一時
之息則氣不屬矣惟其一氣相承廟饗所以嚴也且夫人生以氣

不以形祖宗之死者死其形耳氣則發揚於上爲昭明未嘗亡也當吾祖若父生時非僻之行弗敢逞焉懼其聞而責之也及其死而罔知顧畏則之死而致死之矣不知祖宗之生爲人人以形治形不能無所隔其死也爲神神以氣治氣則無所不通一念之起無不知之故必事死如事生事亡如事存乃不慝於孝也或謂一氣相屬既上溯諸不可知之祖而廟止四世親盡則祧何歟曰此禮之止乎義也七廟五廟三廟之制胥視此矣且無論始祖及不可知之祖也卽高曾祖禰四世抑豈易言事哉吾旣祀高曾祖禰則皆如在其上矣高祖旣如在而吾高祖之子姓苟有顛連窮困者吾不爲之所則高祖之神洞矣曾祖旣如在吾曾祖之子姓苟

有顛連窮困者吾不爲之所則曾祖之神恫矣推之祖若父皆然
卽上至始祖亦莫不然故君子一舉念不敢忘親一舉口不敢忘
親一舉足不敢忘親懼其自私自利而不知本也不知本則一脈
相承之氣我則闕之一絲不隔之神我則背之雖曰具百牢五鼎
如不祭矣詩曰無念爾祖聿修厥德世世子孫念之哉吾李氏之
系前撰宗祠碑備矣茲不復著爲詩以聲之詩曰

眾萬之生橫目芸芸如木有根其初一人析爲千百形氣則均生
我者父父出於祖更淵厥初上及邃古元黃甫判無名可譜總此
一氣呼吸相傳綿延不息亙千萬年反本追始廟饗斯嚴於赫
聖清損益前制典垂一代品官家祭有本有文爲法萬世明明我

祖五季遷平城西卜築自宋汜明繼宅爽溪世讀且耕積久而光
褻綸載錫有列於朝作廟翼翼有庭有榮有堂有室遵王之
制歲事攸宜春秋匪懈誠孝無違本支百世敬而聽之

敕建曾文正公祠碑代

聖清受命二百餘年

三祖

五宗重光襲慶承平既久物熾而豐蘖牙跼伏橫決嶺表越道光
季年乃有廣西逆渠洪秀全等負嶮稱僞號旅拒王師踰嶺趾
湘犯長沙不克遂陷武昌殘安慶踞江寧爲僞都又分黨北擾河
朔東躡瀛碣西略汾晉當是時中原糜沸所過幾無堅城咸豐二
年湘鄉曾文正公以禮部侍郎典江西鄉試聞母訃歸里
文宗顯皇帝特詔公治團練於長沙公曰金革無辟誼不得辭然
曷敢與居常比因疏陳將來卽幸立功終不敢邀甄敘又疏請以

東伍法部勒鄉丁使出境遇賊援羅忠節澤南李忠武續竇王壯
武鑫李勇毅續宜張忠毅運蘭劉武烈騰鴻劉忠壯松山諸公爲
之將是爲湘軍所自始明年命忠節援江西時主兵者爲江忠烈
忠源亦公所薦士也江西圍解乃疏請治舟師援今侍郎彭公玉
麟總督楊公岳斌提督鮑公超黃公翼升等俾領水軍疏調胡文
忠林翼以黔軍來會勦又疏薦塔忠武可大用且曰塔齊布如戰
守不力臣甘與同罪其知人善任使皆類此四年公率水陸萬人
東征初戰再失利尋大捷湘潭以師不全勝自劾未幾復岳州克
武漢大膊田家鎮斷橫江鐵索燔逆舟萬數千遂圍九江進攻湖
口居亡何戰舟深入彭蠡湖賊夜焚襲我師自北岸進陷武昌五

年春公帥羅忠節等援江西而令胡文忠及彭侍郎同扼長江上游規武漢羅軍克弋陽廣信義寧仍檄令援鄂時江境賊麇集公獨當之不畱以自衛也六年江楚道闕公弟愍烈公國華及劉武烈等自鄂來援攻瑞州今粵撫劉公長佑自湖南攻袁州公四弟今威毅伯河道總督國荃自湖南攻吉安是年冬再克武昌七年公以外艱歸明年夏

命督治浙江軍務時王壯武張忠毅已痛殄江西賊劉武烈已克瑞州劉公長佑克袁州蕭壯果啟江江誠恪忠義等克撫建威毅伯尋拔吉安而愍烈公殉難三河鎮九年奉入川之

命中途改 命規安慶遂屯宿松克太湖十年江南軍潰蘇浙並

淪於賊

詔公總督兩江充 欽差大臣遂渡江壁祁門舉今相國恪靖伯左公宗棠肅毅伯李公鴻章分治軍務而威毅伯仍攻安慶明年八月克之

穆宗毅皇帝同治元年正月正元日除協辦大學士乃分道出師威毅伯以湘軍會水師掃沿江逆壘直擣江寧左公以楚軍出衢州規浙江李公以淮軍出上海規蘇常而公季弟靖毅公貞幹用苦戰積勞卒於軍三年蘇杭以次底定六月乙酉威毅伯攻拔江寧僞都粵賊平冊勳

詔封一等毅勇侯世襲罔替加太子太保 賞戴雙眼花翎尋晉

武英殿大學士總督如故科爾沁忠親王勦河北擒寇死事

詔以公代之時湘軍凱撤乃別簡銳卒經略中原議築長牆遏流寇亡何疾作

詔還鎮以李相國代公卒用公方略平寇公謝弗如也八年移督畿輔天津民與西洋人鬪

命公察治之公疏言百姓小忿不足肇邊釁而密議儲將練兵上方略甚備局外不審或用相訾議公引咎而已尋

命還鎮江南有大事咨而決之十一年二月戊午公薨遺疏入

穆宗震悼

詔贈太傅特謚文正祀京師賢良祠昭忠祠並於湖南江寧建

立專祠禮也。既安徽江西湖廣直隸諸臺臣並據輿情入告，請各建專祠。

詔曰：可。於是湖南度地小吳門內，縱七十八丈，橫四十八丈，中建崇祠凡四重，上下亭各一，爲門三，門首牌樓一，東西序稱是。又西爲思賢講舍，又東迤南爲鹽務公所，計堂室庭榮廂移庖，涵百七十有八間，有池廣袤十數畝，爲橋一，亭五，臺二，池畔壘石爲山，雜蒔花木，翼以迴廊，繚以崇垣。垣周二百六十丈，糜白金四萬有奇。自發帑三千外，皆其舊部及湘岸淮鹽商所捐，欵也。工始於同治十二年春，考成於光緒元年冬。蠲吉迎主，官紳士民來會者萬人。旣成禮，眾請文其麗牲之石，謹案盜起嶺西，蹂躪遍十七行省，當

者盡靡公以書生帥鄉人子弟出萬死不顧一生之計誓滅此朝食前後死事至二萬餘人而士氣不少餒豈可強爲哉誠繇

列祖

列宗厚澤漸人至深且久海內皆知敵王所愾公復以忠義勇敢倡之克己而愛人辭巧而就拙一時忠誠所感召眾爭效其所爲以避事苟活爲恥蓋氣機鼓動有莫知其然而然者宜其卒殄十餘年負嵎勦寇解東南數十州之倒懸而繇

國家萬億年無疆之祚歟抑嘗考諸三代稽諸大小雅烝民江漢常武崧高諸詩雖詠歌方叔召虎申甫吉甫仲山甫之功實以彰宣王尊賢使能之盛德然則公功所繇成非遇

文宗

穆宗任賢弗貳抑烏能聲施及此哉故考次方略著公終始大節聲爲銘詩以彰

兩朝先帝之明以稱

聖恩褒祀勲臣勵世勸忠之意其辭曰

嶽嶽文正魯國一儒少宗正學竺守程朱立朝審諤吁咈都俞手梟大憝卒汔王誅厥慙維何葉苞桂管出柳蹠湘於鄂於皖遂窟鍾山眾狂且悍九點齊州幾煙欲滿

文宗赫怒有

詔起公曰予汝知惟汝予同其司九伐以孝作忠公拜且泣盟續

從戎造攻自潭再奠岳鄂大捷田鎮斷橫江索九派潯陽驚萬夜
作迺入西江重樹方略公心如水萬折必東旣清章貢旋指吳淞
銜

命再起厥聲熊熊

詔總師千節鉞是崇公有介弟鼓角填饒靖毅殉勞愍烈死綬維
威毅伯電掣颺馳旣克皖城疾掃南畿

毅皇初載厥齡尙冲

文母負屨眷公益隆元日命相枚卜協從

帝曰欽哉時亮天工登壇誓師左淮右楚二廣分馳摧其角距有
煒湘軍金陵獨舉遂復

皇輿

天子神武捷書夜至上慰

兩宮

毅皇曰都元輔之功告於

九廟帶礪酬庸躬圭信圭魯衛同封公拜稽首翦翦畏慎河朔視
師碣石移鎮簡賢自代用贊廣運爰返三吳以資河澗六十攬揆
公朝京師

天子賜壽奎畫璇題國有大事事有大疑匪卜匪筮公爲普謁公
之相度虛衷求闕神識洞中知人則哲名不已居功不已出人才
我才用之則一公之勲德爛若三辰鄒枚而武李郭而文三代以

還乃有斯人伊呂諸葛庶幾等倫公薨於位

天顏雨泣何以贈之三公晉秩上謚飾終名稱其實吳楚津門專
祠林立湘江衡嶽實公故鄉

詔秩崇祠於粲丹黃公御雲車來饗斯堂刻詩牲幣以備樂章

敕建駱潘張三公祠碑

代

咸豐二年七月乙亥廣西逆渠洪秀全等自安仁攸醴開道犯長沙陝安鎮總兵謚壯武福誠潼關協副將尹簡毅培立寧陝營參將薩保西鄉營都司塔勒禦賊石馬埔沒於陳丙子賊踞妙高峰攻南門時巡撫花縣駱文忠公

內召銅山張公代之未至駱公督所屬文武吏士嬰城守上元潘忠毅公來爲布政使比至賊已薄城縋而入見城中市晝閉乃徒步叩市門反覆開諭肆盡闢人心大安未幾援師集八月甲辰戰南門外朗洞營參將任大貴死之丙午張公縋城入視事賊自南門竄隧道乃調楚雄協副將後官浙江提督鄧忠武紹良永綏協

副將後官鄖陽鎮總兵瞿威壯騰龍各領勁兵入備不虞九月己未戰見家河貴州提標遊擊曾正川死之丙寅戰牛頭洲賓州營參將蕭逢春河北鎮標都司姬聖脈死之丁卯戰南門外商州營遊擊馬義死之丙子南門地雷發城圯越嶲營參將張協忠中礮死鄧紹良力禦之在籍紳士後官布政使銜迤東道黃冕善化知縣後官按察使銜督糧道王葆生等補築立完十月乙未地雷再發城大圯瞿騰龍力禦之丙申賊夜遁己亥官軍追及於益陽大定協副將紀冠軍戰死十二月瀏陽徵義堂匪目周國愚稱亂張公密遣將討平之明年張公署湖廣總督潘公權撫事駱公復任巡撫潘公以疾歸駱公撫湘凡九年治兵援鄂援皖援江西兩廣

川黔所至有成績尋督四川拜協辦大學士薨於位

詔四川湖南各建專祠潘公起署雲貴總督殉寇難得

旨祀湖南名宦祠張公擢雲貴總督調署黔撫免歸薨於里第有
詔復原官三公功德在湖南並家尸而戶祝者也同治十年某
膺 寵命擢撫是邦其明年邦人士合辭來言當悍賊犯城時勢
危甚賴三公帥諸將士戮力同心士民得免屠戮其後克金陵殄
粵逆卒用湘軍底績事在一城功實在天下今賂公專祠方擬建
潘公本祀名宦懇爲張公請專祠並合三公爲一祠庶同歆俎豆
於邦替至福誠尹培立薩保塔勒鄧紹良瞿騰龍黃冕並與祭法
所稱以死勤事以勞定國及禦大災捍大患之義相應請附祀三

公祠以稱 朝廷褒崇忠盡之至意某曰諸君子言是爲具疏陳
請一詔曰可乃卜地城隍廟西爲崇祠上下各五楹門廡稱是旣
考宮邦人士復合辭言是役力戰死綏之任大貴蕭逢春姬聖脈
曾正川馬義張協忠紀冠軍功與福誠等塋登陴協守之升令王
棟生功與黃冕等塋請一律附祀庶足揭虔妥靈慰謳思者之望
某又曰諸君子言是復附驛以請

詔皆如議行迺鐫石紀巔末昭示永永又作迎神送神之辭俾工
歌以祀焉其辭曰

湘之水兮沅沅三公之澤兮與水俱深湘之城兮屹屹三公之烈
兮與城並屹桂棟兮芝楣作新廟兮巍巍望公不見兮遺民悲同

堂肇祀兮薦雌彝靈之來兮容與駕青虬兮驂繡虎有稂兮有黍
芼荃蓀兮潔筐筥坎坎鼓兮傺傺舞靈之去兮踟躕歌受祉兮彈
神絃烝士於學兮宜稼於田時暘雨兮靖蕩煙豺獫遠竄兮蛟鱷
深潛福我湘氓兮萬億年

敕建劉忠壯公祠碑代

同治九年正月丁卯朔越十五日辛巳廣東陸路提督三等輕車都尉達桑阿巴圖魯劉公征甘肅靈州逆回督攻馬五寨中礮墜馬卒於軍時某以陝甘總督督治軍務具狀聞

穆宗震悼 詔從優議卹 贈太子少保 予諡忠壯 賜祭葬

賞騎都尉兼一雲騎尉世職 敕祀京師昭忠祠其陝甘等省立功地及本籍並建專祠事蹟宣付史館明年金積堡平

上追念公功 命賜祭一壇十二年關內肅清 詔加賞一等輕

車都尉世職光緒二年卜地建祠長沙會城小吳門內寶南街越二年祠成公兄子三品卿一等男爵錦棠走書乞某文其麗牲之

石謹案公諱松山字壽卿湘鄉人天性忠勇明大誼識量尤闊遠咸豐初應募入老湘營隸王壯武鑫戲下充第四旗營將轉戰永州郴桂暨湖北江西功皆最會壯武卒軍張忠毅運蘭領其眾公從征江西各郡縣克臨江撫州建昌暨吉水樂安廣昌南豐安仁等城援廣東之連州擒其渠遂轉戰至徽州屯祁門大破賊於盧村還攻景德鎮克之復浮梁尋克建德復徽州暨休寧黟遂下旌德張忠毅以疾歸督師曾文正國藩檄公與壽州鎮總兵易開俊分領其眾守寧國時公已積功賞換花翎洊保提督銜記名總兵賜號志勇巴圖魯矣公之戰江皖也功績多歸統將事不甚著景德鎮之役各營窮追三十里將抵浮梁阻於水橋狹賊擁

不得前因反鬪城賊出乘之各營頗亂次後軍不相屬公獨率所部扼橋東力戰率拔浮梁其攻徽州也各軍分屯民村夜半賊突出劫營勢匆匆諸營驚潰公帥所部山立不動月下遮道大呼曰我第四旗劉某也列隊在此必毋奔奔則成禽矣是二役也微公幾失利曾文正聞之喜曰吾得一將才矣公自是名出諸將上在寧國大疫病者什七八悍賊數十萬更番來犯公激勵拊循士皆力疾戰守數出奇兵破賊得旨署皖南鎮總兵尋補肅州鎮調皖南從文正請也當是時粵逆已蕩平而河南北捻匪棘曾文正奉詔督師疏調公綜理營務湘軍旣平吳會久役思歸休又南人不慣麥食他將奉檄率不願北征公獨投袂起立帥所部渡江

有譁餉不北渡者廉得其魁誅數人而事定抵臨淮易君開俊以
病歸公遂總領湘軍自蒙亳進勦河南逆渠張總愚等謀竄山東
公急扼濟寧賊回竄徐州公會淮軍擊敗之賊分擾西華上蔡公
殲之於雙廟追逼至洪河溺死數千人及郾師之召陵又破之尋
膊賊於南陽新野張總愚遂自河南犯陝西之同州朝邑陝軍迎
擊於灊橋失利西安大震公帥步卒數千馳入關敗賊於晉成堡
姜彥村賊悉銳旅拒公督將士鏖戰賊敗遁同朝圍解優詔賞
荷囊小刀諸珍品尋擢廣東陸路提督敗賊於蒲城躡勦至富平
賊奔三原踰高陵東走公追及數敗之移攻綏德州一戰復其城
賊由宜州踐冰渡河遂入山西陷吉州鄉寧公克吉州賊棄鄉寧

走追敗之平陽賊趨洪洞公夜繞出賊前大破之賊遂道絳出橫
額關東犯直隸境矣某時帥師入衛飛檄公繞踰大行迎截公冒
雪兼程進日踔百數十里以七年正月抵保定詔下所司先行
優敘遂敗賊於獻於深州賊走祁州又敗之追殺至博野又追及
深州捷聞賞換勇號曰達桑阿國語也賊南渡滹沱河畿
輔解嚴公追敗之於彰德至鹽山滄州連敗之遂塹長壕蹙賊七
月擒匪平賞穿黃馬褂及三等輕車都尉公馬首復西矣公從
軍十有八年僅歸省親一次年逾三十聘婦二十餘年未娶婦家
送女至軍中而公轉戰無定所妻父攜女厯湖北江皖居二年皆
弗值至是僑中州以待公既平擒賊以回亂援陝道出洛陽始成

禮會北山土匪二十萬蔓及延榆綏屬羽檄日數至居旬日卽行
旣入秦議先靖土匪乃專力於回匪目董福祥等警公威信率眾
降凡十七萬有奇公悉資遣之亡何所部駐綏德者爲會匪所竄
叛踞州城公馳歸斬倡亂數十人部曲縛首逆降綏德復公坐失
察詔奪職畱任未幾公帥師度隴東越花馬池進剿靈州逆回
破堡寨數百遂拔靈州溫旨開復處分馬化隆者渠魁也性兇
狡旣就撫復叛踞金積堡公急攻之破里仁堡九寨吳忠堡三十
四寨又破金積堡附近二十餘寨九年正月騎賊數千自胡家堡
竄踞石家莊及馬五馬七等寨公帥師馳剿賊於西南面築壘三
乃揮軍奮擊各指一壘破之賊竄入馬五等寨公築壘設長圍困

賊賊出馬步數千來援公鏖戰敗之奪馬百斃賊千明日進攻馬
五寨拔外柵縱火燔寨門策馬督攻益急忽礮彈中左乳親率掖
以歸公創甚猶大呼整隊毋亂行將卒齊憤立拔馬五寨殄殲之
公張目語諸將曰我受國恩未報卽死毋遽歸我喪當爲厲鬼
助君等殺賊也言訖卒年三十有八公治軍寬而有制嚴而不苛
與人共事無居功誘過心語及時局艱危輒義形於色不復知有
身家性命自結髮從戎轉戰十四行省平粵匪擒匪回匪與賊相
終始尤偉者保垂危之秦救不支之晉又速衛畿甸以步當馬爲
天下先其勦回也無戰不克西寧回目馬朵三嘗以千五百騎陰
助馬化隆未半月折其大半逃歸繇是河州臨洮靖遠各回酋莫

敢援化陞其威震西陲若此 諭稱其謀勇兼優無媿名將

上之知公深矣公既誓爲厲殺賊及官軍平金積堡訊俘稱公靖
節後夜輒聞戈馬聲如怒潮湧至賊疑官軍來襲莫敢解衣臥某
駐平涼時一夕聞大聲鳴鳴震山谷察之了無所見疑必有異未
幾捷音至化隆是日就擒矣烏虜公之神在天壤固無所不之湖
以南則公桑梓也廟食百世尤宜某與公馳驅王事以性情相許
追思輒悲痛公兄子錦棠領公舊部出關絕大漠蕩平西域亦由
行公之志也公事蹟在 國史人莫能盡知謹撮公戰守方略及
其終始大節具於碑以稱 朝廷勵節褒功之意又詩以聲之其
辭曰

聖清光宅九有來同 重熙襲祉

三祖

七宗地大物博熾極而豐光豐之交葉芽五管封狼驅羆眾獍且悍闕嶺揭湘于鄂于皖穴有江左踞爲僞都橫噬六合流血成渠誰其應之淮潁妖徒是曰捻匪背城走野牲牲往來中原萬馬倏豫倏秦有地如赭花門勞面種塿羌氏仇殺搆亂荼毒西陲起相應和噬必擇肥惟粵捻回是稱三孽王旅濯征百戰喋血卒汜天誅梟渠鏖穴桓桓忠壯靡役不從初殄粵寇有煒其功繼夷捻賊橫塞其衝星馳入衛耿耿孤忠

帝曰都哉 懋賞酬庸轉旆西征兇酋奪氣疾擣梟巢中礮溢逝

臣力竭矣死當爲厲。竊電鞭霆。誓殲醜類。

天子曰咨。子爾盡傷。乃命司勳。銘于太常。乃命祠官。祝祭于祔世。選爾勞。帶礪冠裳。兕巢。擗拔。卒成公志。

帝念尸臣。遣官賜祭。關內繼平。爵加苗裔。九原可作。感極而涕。湘垣作廟。孔碩且嚴。何以奠之。有敦有籩。

帝詔有司。薦馨萬年。匪予爾私。厥績楸焉。公靈亟賦。訊自囚俘。告禽巨憝。厥聲嗚嗚。神兮歸來。風馬雲車。鏤銘樂石。萬世之模。

湖南省城隍廟碑代

城隍之文見於易。廟祀則不知所自。昉長樂圖經云。漢御史周苛爲項羽所烹。高帝嘉其忠烈。詔州縣廟祀之。然未聞遂名其神曰城隍也。惟鎮江慶元華亭蕪湖等屬祀紀信爲城隍神。龍興吉安建昌臨江南康等屬祀灌嬰爲城隍神。南雍州記亦云。南陽有蕭相國廟。相傳爲城隍神。然則城隍之祀。殆始於漢歟。若其見於正史。則自吳赤烏二年建蕪湖城隍祠外。北齊慕容儼鎮郢城。有禱城隍神。獲祐事。梁武陵王紀烹牛祭城隍神。有赤蛇繞牛口事。嗣是唐張說。張九齡。李德裕。杜牧。李商隱。並有祭城隍文。李陽冰有縉雲城隍祠記。則繇漢迄唐。廟祀已徧天下。宋頒封爵。錫廟額。禮

秩有加焉。明初去廟爲壇。自京師城隍神至直省府州縣封王公侯伯有差。尋詔去封爵。仍用廟祀。稱某省府州縣城隍之神。

國朝因之。會典及通禮有祭都城隍及直省府州縣城隍廟之禮。蓋天生民而立之君。有封疆吏暨郡守州牧縣令以理陽。卽各有神以理陰。陰之與陽。猶晝夜寒暑之相倚。理不誣也。湖南行省治長沙府。於漢爲長沙國。後爲郡。爲州。爲路。至明復爲府。成化十三年分藩於長沙。是爲吉王。城隍廟在府治東北飛虎寨。關帝廟之右。神像鑄金爲之。有文曰都城隍像。正德五年吉藩造。蓋郡既立國。神卽爲國城隍矣。人

國初復爲府城隍。康熙三年分湖廣爲南北二行省。移偏沅巡撫

於長沙法當立省城隍廟未遑也乾隆二十八年巡撫陳文恭公始卽府城隍廟改祀之仍以府城隍配廟遂合爲一咸豐初軍興設火藥局於旁舍九年二月局不戒於火廟鞠毀無片甍存同治十二年議修復僉以兩廟宜分設乃先復府城隍廟於故基越光緒三年八月卜地關帝廟左肇建省城隍廟廟三成各五楹門廡五楹繚以垣爲門二重歌榭一東西廡各八楹分祀九府三廳四直隸州各城隍神猶節署之有屬官廳事也其後爲寢宮爲齋厨神庫崇閣赫明眡舊有加工竣於四年某月糜白金萬二千有奇董其役者候補通判涂鴻儒也新廟旣作像設有嚴簾簋豆尊罍之屬咸飭迺筮曰逆主肅將祀事時某以布政使權巡撫事

眾請文其麗牲之石爰縷述始末臬剏建落成之歲月勒貞石以
詔來者且爲迎饗樂神之辭俾工歌以祀焉其辭曰

大湖南兮風泱泱礪岫嶺兮帶沅湘城伊減兮屹金湯有神綰轂
兮綏是邦神之格兮逶迤駕蒼蚪兮驂玉螭揭桂棟兮芝楣考新
宮兮神是依坎坎鼓兮僊僊舞樽緹齊兮牲折俎神醉飽兮穀士
女祛疫癘兮時暘雨宜稼於晦兮蒸髦於庠祭受福兮善降祥祚
我湘氓兮惠千萬禩其無疆

河泊塘新建屈子廟碑

汨水源出義寧之桓山。西流入平江。又西逕漢昌故城北。又西入湘陰。徑玉筍山。又西爲屈潭。一稱羅淵。是爲屈子懷沙自沈之所。今平湘接壤之沈沙港。蓋其地也。劉氏異苑稱其山川明淨異常。處民爲立廟在汨羅之西。相傳屈子投川。騎白驥而來。今岸側磐石馬跡尙存。廟食茲土久矣。平與湘同爲古羅國。屈廟在平湘不一處。而沈沙港獨無之。非闕典歟。光緒元年。邑人運淮漕者。僉議醵金立屈子廟。卜地河泊塘之邱。業操舟者聞之。翕然輸金以欣。越明年廟成。糜白金萬有奇。廟基廣輪十餘晦。爲堂三成。翼以東西序。其前爲門廡。廡移庖。溷神厨。神庫之屬。咸具像設。旣肅。籩豆

靜嘉父老歎嗟飲食水旱必祭祭必虔以恪爰屬元度文其新牲
之碑謹案屈子爲洙泗鄒嶧後一人其忠則關龍逢比干之殺身
以成仁也其義則伯夷叔齊之舉世非之不顧也其文章則三百
篇後漢魏作者以前屹然一大宗也元度嘗倡建新廟於天岳書
院記之詳矣獨攷其逸事莫詳於唐沈亞之所作外傳傳稱屈子
瘦細美髯丰神朗秀長九尺好奇服冠切雲之冠性潔一日三濯
纓及放廢江南楚俗尙鬼祀必作歌以樂神辭甚俚因栖玉筍山
作九歌託以風諫至山鬼篇成四山忽啾啾若號嘯聲聞十里外
草木皆萎死又見楚先王廟及公卿祠堂圖畫古聖賢人物神怪
琦瑋倬佁因書其壁呵而問之時天慘地愁白晝如夜者三日晚

益憤懣不交世務採柏實和桂膏託遊仙以自適王獨迫之遂以
五月五日赴清冷之水其神遊於天河精靈時降湘浦楚人思慕
每值重五必以筒貯米祭而投之漢建武中長沙區回白晝見一
人自稱屈左徒曰君見祭甚善然宜裹以楸葉五色絲縛之庶不
爲蛟龍所竊今角黍其遺制也外傳略如此烏虜屈子至今二千
餘年矣鄙郢既墟秦社遽屋亡秦者涉也心也劉也項也皆楚人
也屈子之孤憤宜可以舒矣抑自嬴顛劉蹶已來滄桑岸谷類浮
雲之變滅於太虛而予之節義文章獨能光日月動鬼神永與山
川不壞然則昔之苦雨淒風今宜爲祥雲善氣矣庶幾時雨陽祛
疫癘以永福我湘氓於弗替哉傳曰樂操土風又曰數典不忘祖

今之迎饗樂神也宜楚聲迺爲之辭曰

溯汨羅之漉漉兮陟玉笥之嶽嶽攬杜蘅以掩涕兮謦獨懷此湘
纍蹉靈均之姱節兮佩申椒與菌桂執九畹及百晦兮又紉之以
蘭蕙悵靈修之忉忉兮信謠詠使嫉娥眉猶專佞以叨穢兮蕭又
充乎佩幃忱鬱邑而侘傺兮曰余式乎前德寧赴湘流而葬魚腹
兮循彭咸之遺則神濫埃風而上征兮望故都且焉止息鼙發軔
於九疑兮就重華以告哀夕弭節於洞庭兮訴帝子而抒懷前羅
孝子使先驅兮後賈生其許追陪神剡剡兮歸來作新廟兮汨之
隈蕙棟兮莖堂卒夷楣兮葑房芰荷衣兮芙蓉裳神之格兮宴娛
援北斗兮酌天漿神醉飽而降福兮驂青蚪與赤豹俾江水其安

瀾兮駛蘭橈與桂櫂羅之國兮汨之邱家有慶兮歲有秋更千齡
萬禩兮薦角黍而飫靈麻

昭顯真人廟碑

同治十年夏六月縣大旱眾怒甚乃奔走呼囂迎昭顯真人之神
自瀏陽祖師巖至縣南鄉除壇以禱越四日大雨槁者興呻者斂
歲則大熟乃謀答神庥卜以筵尊凡數請弗俞卜建新廟則吉再
卜地得廟基於爽源仙人洞又襲吉父老皆再拜曰洞幽勝有仙
蹟雅與廟稱殆天作而地成之以妥神而祚我民者耶遂卜日旬
工度材於岡陶甓於場伐石於山之陽旣庀旣飭不窳而良越三
月廟成糜縉錢三千二百有奇乃筮穀迎神期而集者萬人籩豆
牢醴告備鐘鼓管籥聲相聞眾屬元度以文紀歲月不敢以不敏
辭謹案真人陳氏諱世賢字榮芳瀏陽北鄉橫塘人以雍正七年

八月十五日生少孤貧事母至孝爲縫人以養性不茹葷血母卒屏人事裹糧遊武當山得辟穀術及歸囊尚有餘糧隱瀏東大光洞祖師巖巖在福石山之陰面瀏背平人跡所不到以乾隆三十八年除夕坐化巖中春秋四十有五肉身不壞目灼灼有光所遺刀尺尙懸巖壁閭鄉人廟祀之嘉慶中歲旱嘗示夢居民禱雨立應咸豐三年土匪周國虞作亂四年粵寇竄醴陵六年自通城義甯疊犯瀏陽東北界瀏人練鄉兵禦賊並賴神力瀕危得免乃合詞籲大府乞疏請

封號答神勞巡撫侍郎駱秉章以

聞得

旨封昭顯真人禮也先是平江士民踰福石山謁廟道險艱至是新廟成眾皆稱便飲食必祭疾痛痾癢必禱神亦屢出奇驗以震盪人耳目而作其恭其諸誠不可揜者歟雖然民之感神也以誠神之福民也以善傳曰作善降之百祥又曰黍稷非馨明德惟馨然則求格神者舍悔過遷善以對越神明夫豈有他術哉元度思禱神者不反求諸己也謹發斯義以爲自求多福者告又作迎神送神之詩使工歌以樂神其詩曰

神之靈兮格思驂皓鶴兮駟玉螭溘浮雲而下降兮卓岑纚之靈旗合上池之丹藥兮採園圃之瓊芝閔眾生之疾疾兮蠲沈痼而紹軒岐民無札兮物無疵痾瘰在宥兮爲民依膺真誥兮案功行

其巍巍

神之逝兮徜徉朝弭節於淮川兮暮擊汰於羅江紛總總其繁會
兮奠桂醕與椒漿既醉既飽兮樂無央福我民兮壽且康田宜稼
兮時雨暘旸疫鬼兮驅騰蝗更牖我民兮澡身滌慮肩眾善而介
百祥誰謂神遠兮森臨上而質旁

明斬國武康康公廟碑

古英傑非常之士生爲名將相成佐命勳沒則廟食百世三代下
若漢之蕭曹馬鄧季漢之關張唐之郭李張許宋之韓岳明之徐
中山常開平沐黔甯諸公莫不生英死靈與天壤不做若斬國武
康康公其一也謹案公諱茂才字壽卿斬人通經史大義事母孝
元末寇亂結義兵保鄉里官淮西宣慰司都元帥太祖克集慶帥
所部來歸授水軍元帥屢破張士誠兵陳友諒陷太平約士誠合
攻應天公與友諒有舊紿爲內應誘至龍灣大敗之以舟師從太
祖克安慶破江州遂下斬州興國漢陽克黃梅寨取瑞昌又從援
南昌戰彭蠡友諒敗死從征武昌皆有功尋從大將軍達克廬州

取江陵及湖南諸路太祖擊士誠於鎮江士誠遁公追擊大敗之
淮南平轉拔湖州進克平江路還取無錫累遷同知大都督洪武
元年從大將軍經略中原取汴洛開守陝州扼潼關善招徠撫綏
民立石頌德焉是年復從大將軍征定西取興元還軍道卒追封
蕲國公諡武康此著在本傳者也吾平向未有公廟明吳景輝官
四川通守署左有公祠比秩滿歸舟行已千里矣夜夢緋衣人曰
予君比鄰康某也當血食君邑願同行盍還取我像景輝曰逆流
不易達奈何曰鵠首第西向朝發可夕至也如其言果不爽及抵
平奉像至長壽里擬暫移別墅重莫能舉眾異之遂廟於此今所
稱太尉廟者也 國朝乾隆四年里紳吳於袞協君雲卿醵金重

修公廟。雲卿父尊三。復斥已費。建歌榭。規制備焉。嘉慶十二年。雲卿子炳南映南拱南斗南。勾工拓地。擴舊制十之三。語詳前記。道光季年。廟漸圯。維時海口通商。平東產茶。以長壽爲都會。泉刀之利。歲入百萬緡。商有羨財。民有餘力。乃相與謀曰。微神之惠。不及此。非鼎新廟貌。其曷以揭虔安靈。仰答鴻貺。於是雲卿子姓某某大集九社士民。議撤而新之。別建傑閣三層於廟前。踞一鄉之勝。工始於咸豐元年三月。落成於三年八月。糜白金五千四百有奇。悉出眾輸。乃屬元度爲之記。元度嘗謁公廟。見右楹有刀陷木中。眾指曰。道光甲午。市儈貪賴。枯客所寄。囊爭不決。借質於神。故事。鳴神者。各執雄雞一。以刀剗其首。曰。予所否者。如此雞。估客如其

法雞首立斷市僧舉刀欲下忽昏仆刀失所在僅柄存手中迹之
則飛陷楹端事立白逾年市僧家數口死且盡神之彰瘝赫濯能
驚動禍福斯民多此類其有裨於人心世教何如哉宜吾平人俎
豆尸祝之與蕭曹馬鄧關張郭李張許韓岳諸公並歆血食於無
既也抑考太尉官始於秦見月令漢唐宋皆因之明史百官志無
太尉世俗以稱公廟蓋由縣境別有康太尉廟祀宋太尉康應字
保裔者誤合兩人爲一耳既以諡於眾爰作迎享送神之章遂以
聲諸樂石辭曰

神之來兮洋洋朝蘄水兮暮建康鍾山硯畔兮孝陵在望駕玉螭
兮宴娛騶文豹兮翱翔昔廟食於西蜀兮尋改卜於衡湘天岳山

兮戔戔汨羅水兮湯湯新廟有作兮薦荔丹與蕉黃神嗜飲食兮
醉飽犧牲雞卜兮來歆我觴

神之去兮遲遲乘元氣兮薄希夷紛總總兮揚靈旗初弭節於昌
水兮繼晞髮於瑤池穀我士女兮壽我蒸黎田宜稼兮蠶宜絲茶
入市兮鏹纍纍千艘萬舶兮瀛海之西無水旱兮無蝗饑驅厲鬼
兮役鍾馗鼓坎坎兮舞儼儼神血食茲土兮更千秋萬歲其永與
吾民相依

前永州太守楊公生祠碑

咸豐九年春二月粵賊僞翼王石達開率黨數十萬自南安入楚陷郴桂二州將乘虛取永州以犯長沙時督亢楊公知府事聞警與署總兵侯君光裕零陵令施君濟及郡紳共籌戰守策括存城兵止四百練勇止六十人乃檄施令暨守備賂光泰郡紳趙履祥募勇千餘入城守時侯選道劉公長佑知府江公忠義奉巡撫檄帥所部數千人援郴桂遊擊余星元楊恆升都司李金暘各帥所部援江華公馳羽書丐諸軍改轍來援三月辛未朔越翼日壬申賊抵白水嶺防勇不能禦退保郡城人情恟懼公步出通衢誓眾以死守各授兵登陴癸酉賊薄城踞民廛爲窟甲戌犁旦賊攻城

銳甚公及駱光泰守東門總兵守北門千總方振鵬守南門礮斃
大旗賊賊少卻日午復攻且梯城我軍疊殪之比暮賊環屯城下
燒灰徹矢公命丁男無老幼悉乘城婦女烈焰守門戶炊黍餉軍
城上火光照十里五鼓風雨暴作燈火滅軍民露立寒慄不能支
賊糾譟攀堞上當是時鎗礮聲與風雨聲相激怪鳥類鵩鴟悲鳴
徹旦士民相顧失色公下令守卒擅離寸步者斬賊數上數擊卻
之厥明雨止公募敢死士縋而下焚賊踞民房賊退伏不動公捐
俸錢五百貫犒軍軍心益奮乙亥賊再攻來愈眾望之不見其後
公曰毋浪戰援軍且至其堅守以俟公之乞援於劉江也師適過
祁陽祁陽令劉君達善力請赴郡城言之至泣下劉公投袂起令

江公先領一軍壁江口。又令都司王順慶帥三百人助守城。丁丑自西門入。戊寅，奈楊軍至，壁城西。少選，劉公亦至，壁接履橋。江軍告乏食，公餉錢四千，糗米三百石。各軍始合會。己卯，劉江二軍及賊戰，大捷，逼賊營而壘。奈楊軍作浮梁渡湘，合擊，大破之。然石逆方率後隊至，屯菱角塘。城圍尙數日，內外閫不相聞。公募壯士，梟水渡江，約諸軍夾擊。命郡紳趙肇光、李榮賜等出爲前導。壬午，各軍大合戰。城上軍譟而出，自後夾攻，賊潰。從南津渡奪路奔適李金陽，自甯遠來援，抵香苓山，驟與賊遇。出不意，猛擊，賊自相踣藉死。方渡河，筏斷，溺死數千人。遂破菱角塘數十壘，追奔二十餘里，殲賊凡數萬，生擒數百，悉斬之。癸未，賊遁石逆，分黨犯祁陽，不克。

又分擾郡屬遂圍寶慶累月不能下乃繇粵竄川尋爲官軍所夷滅矣方事之殷公腰刀帕首衣短後巡城諭家人各爲自靖計賊退郡民數萬相率拜馬前泣曰公活我又私相慶曰微我公吾屬無噍類矣逾年公遷辰沅兵備道去之日傾城跽送趾相錯於路又九年有

旨內召公以母夫人篤老引疾致仕郡人聚而咨曰公歸不復矣公之德不可諉也迺謀築生祠眾皆趨赴不數月祠成郡紳何若泰等具事狀屬元度文其碑竊嘗論三代下漢法最近古漢之太守實兼將帥之任故治效多殊異朝廷慎置寄臨事擇將不若先事而擇守公在永力拄危城藉固會垣門戶實無忝古太守之職

功豈勵在一郡哉抑攷生祠昉自漢張奐任延于定國鄭眾等而
令甲弗著慮或干譽及貢諛也公去郡已十餘年去官且三年則
無復前者之疑矣公名翰字海琴晚號息柯直隸新城人道光乙
巳進士由編修出守官至辰永沅靖兵備道加布政使銜 賞戴
孔雀翎余嘗謂公以文章掩其政事其治狀上官或不盡知故未
竟所施設而被澤之士民獨俎豆而尸祝之愈久弗衰抑可見三
代直道之公之不容泯也記曰以勞定國則祀之能禦大災捍大
患則祀之是祠也實應祀法故具記其本末以備 國史之採且
詩以係之曰

古零陵郡介楚粵交二水來漚曰湘曰瀟實據上游會垣門戶粵

有猷有爲。繇吳轡楚。瞰郡城虛。悉黨來犯。礪彼豺豕。其威虓鬪。顯允楊公。實守是邦。登陴誓衆。與城存亡。迺召援師。兼程雨集。公帥貔貅。外內合擊。旬有一日。賊踣而遁。闔城耆庶。祝延懽嘽。有斐幡幡。有婦有子。曰匪我公。成齎粉矣。公之去郡。十有四年。民不能忘。作堂嚴嚴。八愚之壤。左渠右邱。抗手元柳。並峙千秋。公今歸只。德音不已。我作銘詩。敢告惇史。

李烈婦吳氏殉節碑

同治四年五月十四日夜教匪陷石阡府城經歷李雲昇星階之婦吳氏死之吳本滁州舊族幼讀書識大義兄青蓮貢生星階籍沅陵以咸豐二年從軍隸提督和春麾下由粵而楚而吳凡數載索保今官與青蓮善寓常州聞吳氏賢委禽焉六年來歸九年生子鏞星階乞假歸吳氏事舅姑惟謹是歲星階奉部檄之官挈與俱石阡苗稱亂久黃平施秉閒莠民應之曰教匪有黃號白號諸目列屬無完土在官日食常不繼吳安之家居飽閱亂離狀嘗從容語星階曰女以節爲本吾見被掠者俘係若犬豕然何苟活至斯也是夜賊襲城星階督民兵出禦被重創賊攀堞入吳氏見火

四起急挈子若女授僕媼使逃自以頭觸柱不得死拔刀自搯其
胸腕弱未殊解帶自經乃絕年二十有七越日星階隨郡守徵鄉
兵復城趨殮吳氏面如生刃猶陷胸閒也星階大慟曰吾婦不愧
平生之言矣郡守上其事得

旨旌郡人就殉節處建亭立碑垂示永久銘曰

觥觥烈婦在皖之滁清流關迤豐樂亭孤曰相夫子五溪是宅落
拓一官羅施鬼國天狗宵墜滯聲若雷有獅其噬城門夜開烈婦
聞變目眦迸裂頭觸不周天柱欲折飲刃不殊繼以縋首浩氣衝
霄噴薄牛斗人誰不死死重泰山詔立綽楔血碧土斑五老峰
前牂柯江上琢銘貞石坤維藉壯

重修宋君子萬子靜先生墓碑

宋鄉賢崇祀君子祠萬子靜先生生於宋紹熙初壽六十有七以寶祐二年甲寅歲葬縣東泐頭古塘塹歲久碑碣不存越五百五十六年爲

大清嘉慶十六年辛未夏大雨土崩出古壙有石刻地券載先生名諱及卒葬年月地主國子生余高遠及其子諸生澤琨瑋治之又得地券一知夫人毛氏實與先生合葬乃立碑志崖略又六十年當同治十二年癸酉地已數易主有土人造屋隧道前先生裔孫克紹等慮其戕犯也亟諗於族眾圖免後艱先生之裔有居義寧州者曰承風乾隆中進士官禮部侍郎 贈尙書諡文恪文

恪元孫曰椿齡方以知縣需次湖北至是亦來會乃價買古塘坊
原山立石爲界又明年重修墓道屬元度以碑紀其事謹案先生
諱鎮字子靜一字見春淳熙十年進士官澧州司戶參軍先是紹
熙初朱子帥長沙吾平李君儒用吳君雄李君璠鄭君輓李君杞
李君雄並親往受學先生則與方君輓魯君仕能同受學餘干饒
雙峰之門實朱子再傳弟子也其學深究性命之旨與仕能齊名
雙峰嘗語仕能曰天下讀書人鄱陽湯伯易第一子靜次之湯亦
饒門高弟也賈似道帥荆南嘗辟先生爲公安書院山長拒不起
居鄉仿朱子社倉法積穀振饑有規約存邑乘中所著左傳十卷
今不傳行誼詳通志一統志及楚寶宋元學案中元祀君子祠及

鄉賢所居曰萬家坊有橋曰萬婆相傳先生母夫人所建也先生夫婦合葬於斯殆距居宅不遠其後裔乃散居平江巴陵及江西之義寧德化云烏庠先生之墓厯六百餘年復昭顯於世殆將與天壤不敝而余上舍表章於前今子姓重加封樹皆義不容已也爰爲之銘曰

朱南渡之世汨水之濱傳紫陽學者凡十有三人孰爲後勁曰萬見春其幽竊卜藏茲土其神爽則揖讓陟降於洛閩諸先賢之門後有千載尙欽式乎茲墳

凌氏族重修遠祖清海公墓碑

古者墓而不墳不封不樹凡以葬者藏而已矣然禮系曰天子墳高三雉諸侯半之卿大夫八尺士四尺則高俾已有定制孔子修防墓封之崇四尺用士禮也周禮墓大夫掌邦墓之地域然則記所稱若堂若坊若覆夏屋若斧者蓋皆有職掌焉凡爲人子孫莫不慎守先人之邱壠而歷世久遠塋兆湮沒不可考往往莫可如何有能保世滋大閱千百年而馬鬣巋然則其祖若宗必有大功德足以覆露其後人抑又非得賢子孫不能及此也凌氏系出衛康叔支子爲周凌人以官氏吳偏將軍統其裔也世居丹陽五季時十五世孫修舉賢良中第丞岳州之平江卜居清水遂族焉數

傳至德朝遷小樑是爲小樑凌氏之始。清海公諱泰來居小樑之萊畚坡。曾祖雲翼。宋建炎中領漕薦祖禹。圭四川名山縣令。父伯愷。行誼詳邑志。爲縣令楊侯寅所禮重。其卒也。主簿劉君平一志其墓。有子四。公其長也。公之配單氏。子曰萬。單傳三葉至六世孫友清。始生天富。天貴。天壽。天祿。凡四子。今所稱下四房者也。公之行實世遠莫能詳。然自公至今。傳世數十。越時數百年。子姓男女不下數萬指。簪黻相仍。取科第者踵接。孰非公流風遺澤之所保。艾歟。公以元至正八年戊子歲葬楊梅江大竹園對岸。今呼爲紫草坪。煙竹塋。癸首丁趾。與單孺人合墓。公之子姓思其久而漸澤也。乃增購墓之前後左右山。重加封樹。正疆界。鏤貞珉而屬元度。

紀其顛末余聞齊師伐魯獨於柳下惠之壘禁樵採漢高帝爲信陵君置守冢三十家重其人必式其墓也况子孫之於祖宗歟又况其爲繼別稱宗之祖歟迺爲銘曰

自至正八年至今五百三十年矣其開陵谷滄桑變滅而湮沈者不可選紀而公夫婦之壘獨厯刼不磨若此禮器未發於青州前和弗齧於灤水繇世澤之延洪抑雲仍之趾美繼自今于萬斯年式茲墳者尙想像乎高峙之祁連與尸祝之畏壘

先世父暨先府君合葬墓碑

有序

古無兄弟合葬之明文。洪氏隸釋錄郎中馬江碑述其中弟文緒事實。跋云：因與其季合厝，故作碑併及之也。望溪方氏表寧化雷氏先墓，有兄弟八人葬同邱，事在五代時。而望溪亦與其兄舟弟樞約同穴葬。同時甯都魏叔子兄弟亦然。此禮之以義起者也。先世父通議公終於嘉慶二十二年。先府君光祿公終於道光四年。原葬地皆不墨食。十六年春，得兆域於祖宅後山。卜者曰：吉。先大父乃命孫元功等曰：既得吉卜，其遷爾父爾季父合葬之。乃筮曰：改。定庚寅甲趾。其時距世父卒二十年。距府君卒十有三年矣。又四十四年。當光緒四年戊寅。元度始勒石隧道銘其碑。

世父諱傳郊字希宋號孟卿其曾祖諱萬才國子生追授光祿寺
典簿妣氏曾 贈安人祖諱自芳縣學生 誥贈光祿大夫妣氏
余 贈一品夫人父星垣公諱家庚從九品 誥贈光祿大夫妣
氏徐 贈一品夫人先世來自豫章 國初自縣西門遷沙段乾
隆十一年卜居今宅先大父有子二公其長也生而樸毅寡言笑
尤敦內行視浮奢習去之若浼服御儉陋衣非數澣緝弗易嗜淡
巴菰好徹夜危坐先大父兄弟五以食指繁析筋居曾大父故名
諸生大父昆仲皆能文絀於試惟五伯父遜吾公早慧公同堂弟
也公自以少廢學甚憾之既析居慮遜吾公或以家累輟讀乃言
於大父請與伯祖合爨而自課耕牧俾遜吾公得壹意讀書二父

嘉許之會公得疾不果其後遜吾公舉拔萃科預鄉薦公皆不及見然每言及輒以公爲知己也公初娶於喻生女二繼娶吳生元功吳卒再繼丁生元勳丁又卒賴大母徐太夫人鞠之公旣屢喪偶踰年感傷成疾卒距其生乾隆五十六年某月春秋三十有七子元功 贈五品階孫積謙貴州補用通判加知州銜曾孫厚塋廕監生候銓縣丞次子元勳早世 贈三品階孫積經花翎運同銜加二級廣東德慶州知州署封川縣知縣嗣曾孫厚英光祿寺署正銜孫女四人曾孫女四人公初以積謙貴 誥贈奉直大夫繼以積經貴 晉贈通議大夫喻吳丁並 晉贈淑人

府君諱某字仲朱號小卿其生也後世父十六年世父旣未竟於

學大父益殫力課府君。府君性穎特，以大父績學未遇，思自奮於甲科，爲親慰。從五伯父遊最久，未冠有文名。其注學籍，願獨在諸兄後，則益悴於學。終年閉特室，手披口吟，忘寒暑。晝夜以求之，得咯血疾，諱不言。道光三年，受知督學郝文端公，拔冠郡學，再試愈激賞之，曰：「業成矣，科第可芥拾也。」時大父母年並六十餘，自世父世母先後逝，所遺二女皆不祿，積歲憂傷。及是始一開口笑。明年府君將讀書嶽麓，未行而病，越數月病革，語吾母，喻太夫人曰：「吾不能終事兩大人，反遺大人恫，不孝孰甚？死必以衰經殮，將屬纊，問後事不答，惟自引其衣，申衰經之命也。」時在九月十九日。距其生嘉慶二年五月二十八日，春秋二十有八。府君篤孝友，與人溫。

摯閒雜以詼諧讀書日有程課手寫經史古文辭二十餘帙其卒也。大父母哭之幾喪明。賴吾母守節奉舅姑。字孤得有立。越十年。大母考終。又十四年。大父乃終。府君初奉特旨誥贈奉政大夫。晉贈榮祿大夫。再晉光祿大夫。吾母晉封一品太夫人。長子恩覃奇慧。甫周晬識字。二千有奇。四歲殤。次元度。道光癸卯舉人。花翎布政使銜。浙江雲南按察使。色爾固楞巴圖魯。孫積琳。花翎三品銜。江西補用道。積璠。拔貢生。花翎四品銜。兵部員外郎。積璠。幼孫女六人。曾孫厚荃。厚蓀。厚葵。其出嗣積經者曰厚英。曾孫女五人。銘曰。

爽溪之邱。羣山所宅。元氣蜿蜒。來自福石。維我世父。泉先府君。同

氣合窆有礫其墳王考之命禮絲義起以奠幽宮以庇厥孫子其
萬億年膺天之祉